



Nuuk, 13. Oktober 2015

Inatsisartut Suleriaasianni § 37 naapertorlugu Naalakkersuisunut meeqqanut inuusuttunullu inatsisissamut tunngasumik apeqquteqarpunga.

Apeqqutit:

1. Tusilartunut siunnersortip, tusilartut tusilartuunermullu sammisut kisiisa atorfimmini suliassarai?
2. Taamaangippat suut allat suliassarai?
3. IPIS Sisimiunut nuuppat, atorfik ataasiinnaassava?
4. Ukiut tamaasa Ussersornermik oqaasillit (Tegnsprog) naapittarnissaat Naalakkersuisut pilersaarutigaat?
5. Tusilartut ussersornikkut attaveqaatillit ukiumoortumik naapittarnermikkut, ussersornerup, tusilartuunerullu iluani pissutsit ineriartornerup kingunerisaanik allannguutit, pikkorissarnikkut pisarpaat?
6. Tusilartut naapeqatigiinnerisa saniatigut, ilaqutaasut ukiut tamaasa pikkorissarneqartarnissaat Naalakkersuisut pilersaarutigaat?
7. Nutserisumik atorfeqartitsinissaq siunertaava?

(Inatsisartunut ilaasortaq Agathe Fontain, Inuit Ataqatigiit)

Tunngavilersuut:

Siusinnerusukkut Tusilartunut siunnersortitut atorfiit marluupput. 2007-ip nalaani Sisimiuniit Nuummut atorfiit nuunneqarput, atorfillu ataasiinnanngortinneqarluni. Atorfiit marluugallarmata Innarluutillit Tegn Til Tale-mik pisariaqartitsisut ilanngullugit ilaqutaasut ilanngullugit pikkorissartinneqartarlutik, taamatuttaaq inuunerup ingerlanerani tusilartunngorsimasut, ussersornermik pikkorissartinneqartarnikuupput.

Tusilartut pisariaqartippaat, ussersornerup iluani nutaanik takkuttoqartillugu pikkorissarneqartarnissartik. Soorlu tusilartunut tunngasunik teknikkikkut nutaanik takkuttoqartillugu aamma pisariaqartittaraat pikkorissarneqarnissaq.

Sinerissami tusilartut ilaat kiserliortuupput. Ukiumut ataasiarlutik naapeqatigiinneq pisariaqartittarlugu. Tusilartut arlallit namminneq meerartaartarput, taakkulu pisariaqartippaat ussersornermik pikkorissartarnissartik, soorlu ilaqtat ilaat aamma pisariaqartitsisartut. Taamaammat naapeqatigiittarneq isumalerujussuuvoq.

Ullut suliffiusut qulit iluanni apeqqutit tamakkerlutik akineqarnissaat qinnutigissavara.